

# Parolla

## Ziieenniicca...

Erani sett'ori menu cinque, quando Ghjuvanna ghjunsì in piazza di u Presbiteriu.

A vittura di u sgiò Curatu ùn c'era micca sottu à u tigliolu.

« Indu sarà à st'ora ? » pinsò Ghjuvanna puntiddendu u baveddu incù a so mani manca, i diti spalancati com'è una furca. È cusi, si n'era ferma supr'à piazza in piena mità di u stradonu.

U primu chjoccu di l'Ave Maria scurendu la li missi l'idei in piazza. À voci alta, dendu si una sciappata à nant'à a so coscia, sempri incù a mani manca, Ghjuvanna s'assigurighja.

« Ùn di più mi ! chì u sgiò Curatu si n'hè falatu in a zenica. Ma ch'iddu ùn fussi quì à st'ora, ùn hè micca nurmali! »

Pà ghjunghja in a zenica a strada ùn era tantu bedda. Ancu s'idda ùn c'era mai ghjunta in a zenica, Ghjuvanna sapia ch'id-di erani lochi maladetti.

A sociara di a so Minnana, culpadori à quidd'epica si ni falaia suventi in quiddi rugghjoni. U stradonu ùn era mai statu compiù, chì pà sfà i scaffì di u Diavuli nimu s'era risicatu.

Ghjuvanna si misciò, « è si u sgiò Curatu s'era intratu incù a so suttana è s'era troncu u coddu in quiddi scaffacci... ! » Ghjuvanna si laca piddà pà u trimuleddu, dighjà chì quiddu lumineddu russia chì uchjighjghja in cimiteriu li dà a papata. « - Avia bisognu di falà in a zenica, quidd'altru ? Certi sò à l'oziu... Com'hà da fà dumani pà serva a missa, ùn ci hè più vinu in Sacristia è u sgiò Curatu, di quiddu di u supermercatu ùn ni voli.

Li staghja bè à idda chì t'aghja à serva a missa à i so anni, à u locu di stà si ni in casa com'è tutti à fighjulà si i so «feuilletons». È matriculendu Ghjuvanna ghjirava à u tornu di u tigliolu come s'idda fussi affibiata, lampendu un'uchjata in cimiteriu è vidindu u lumineddu, Ghjuvanna si ramintò di zia Lisandrina chì a curcia, i scaffì di u Diavuli l'aviani costu a vita, è li paria di veda la tutta vistita di neru sorta si ni di u cimiteriu. u cataru in farru lintò u so raghju, i cancarì rugghjinosi chinchinaiani lintendu un lagnu addispiratu:

- « Ziieenniica ! »...

Sintindu piddà si da l'affannu Ghjuvanna s'avvia à capu in ghjò abbattutendu è ghjastimendu, preti, vinu è Ze... Auh ! certi parolli hè meddu à ùn mintuà li si vò ùn vuleti perda u ciarbidinu...

Anghjulu

## È CUSÌ SIA

Dumani hè dumenica  
U preti hè in a zenica  
A zenica hè rutta  
U preti hè in a butti  
A butti si sciappa  
U curatu si ni fala  
Stracquatu in tarra  
U nasu ciacciato  
U baveddu sfraciatu  
L'anchi sbalancati  
A bucca sfaracata  
Chjamendu aiutu  
À tutti li santi  
Oimè ! O Ghjesù !  
O Santa Madonna  
O Virgina Maria  
Infini chì s'arizza  
U capu zurdulitu  
Da essa imbambulitu  
I vinochji agrancati  
A suttana strappata  
Si ni volta in casa  
Chjamendu i santi  
Pà la Madonna  
Dumani hè dumenica  
A' fà a so predica  
Li ci voli a so butti  
Chì fà, ch'ùn fà  
Eccuti chì si metti à laudà  
O Santissimu  
O Ghjesù Maria  
O Santa Madonna  
Vò chì seti patrona  
D'inghjò è po d'insù  
Sò curciu à l'adisperu  
D'avè tanti castighi  
Dighjà sò nud'in Cristu  
Capiti chì sò tristu  
D'avè tantu prigatu  
Riceva tanti strazi  
Pensu ch'aghju purgatu  
Tutti li me attrazzi  
U spiritu ligeru  
Vi pricu lu miraculu  
D'avè in Tabernaculu  
Cacciato lu Piccatu  
Ma par essa Cristianu  
Mi ci voli u pani  
È po ancu u vinu  
O chì gustu divinu  
Dilicatu è finu  
Eccuti una vita  
Biniditta è pia  
È cussi sia  
In Sacristia.

Doria

## A ZENICA MISTERIOSA

A zenica ch'è vo vidite qui, l'aghju trova una dumenica dopu meziornu, vicinu à a torre di u prete, longu à a batticcia.

Sarà stata purtata custi da u mare, o scurdada da qualchi stantante pressatu di piglià u battellu è chì avia vulsutu ciuttà si un'altra volta in l'onda tepida di u mese d'agostu, prima di vultà si ne in casa soia.

Marchjava, mutu è silenziosu, nant'à a striscia di rena infittata è ogni tantu facia un passu di latu, rapidu, da schisà l'assaltu subitanu d'un marosulu zirlatu d'un colpu. Esciutu da ùn sò induve, cù una sbuffulata di ventu chì stanciava subitu subitu.

À manu à manu aghju rimarcatu l'affare mezu interrato in a rena. U solcu di l'acqua è di e petricelle tirate purtate da l'acqua chì si ritirava lacava affaccà cum'è un ditone neru è verdognu. Sò piantatu. Ùn si sentia un zittu è i nuli, carchi d'atrachji, sò picciati d'un colpu, propiu à u ciuttà di u sole.

Mi sò indinuchjatu à mez'à a rena umida, da pudè frugà megliu in giru à a cosa. A notte era falata in u frattempu. E mo mani cunturvanu à pasponi l'ogettu, cù mille precauzioni. Soca ci sarà statu ancu à pena di paura. O piuttosto di timore, o nanzu di timichezza chì avia a cuscenza di scopre pianu pianu una cosa sacra, incunnosciuta, è forse appena fantastica.

A prima impressione di u ditone sticchitu, pisatu sopra à rena croscia, rivenendu mi in mente à l'ispenserata, m'hà messu u fretu ind'a lisca. Tandù mi sò intesu in quella di pisà mi d'un colpu è di scappà mi ne luntanu da u cadaveru chì, era più chè sigura, era statu interrato custi. Mi pisai è po ci era tutta l'aria cheta, serena è zeppa. Sò turnatu à ruspà in giru à l'ogettu è ùn sò statu tantu à sculinà u so corpu tondu è lisciu, ficcatu prufondu sottu terra.

Aghju aguantatu a cosa per u ditu, è tuttu mi hè venutu in manu, cù u rimore di l'aria liberata d'un colpu da sottu.

L'aghju purtata qui, lavata cum'è ellu si deve, è po l'aghju sposta custi. In ricordu di issa passata di i mo ghjorni smarriti.

Ghjacomu

## U PRETE ZENICATU

Dumane hè dumenica  
U prete hè in a zenica  
A zenica hè rotta.  
U prete hè in China  
Ci impara alt'affari ;  
S'avvia per l'India  
Cù un celestu tappettu  
Tuttu suminatu à chjodi.  
Chjodi di mari luntani :  
Pare in veru un ursinu  
Chì punghje è si move :  
O chì bell'animale !  
S'assumiglia à un cignale.  
Pelli ritti è musu longu ;  
U si manghja u prete.  
Prete di poca fede  
Chì bulicheghja animali  
Di terra è di mare !  
Hè colpa di a serva  
Chì hè affannata.  
Dumane serà malatu  
Ma dumane hè dumenica :  
A messa quale a dicerà ?  
Ellu in a zenica  
Bellu piattu starà.

Stella

## VERANU

Donna misteru  
Spalanca u to purtellu  
Fiore veranile  
Hè a vita chì spunta  
In issu pettu rispiru  
Hè a pace chì volta  
Hè l'amore spannatu  
À l'Universu offertu  
L'alba si hè incantata  
Di issu purtellu apertu...  
Donna misteru  
Spalanca u to purtellu...

Stella